

In center regional per l'agricultura


Las lavurs per la stalla nova dalla claustra a Mustér/Salaplauna han entschiet

DA HANS HUONDER / ANR

■ El decuors dils proxims meins vegn realisau a Mustér/Salaplauna in niev center regional per l'agricultura. El consista dil menaschi puril dalla claustra che vegn menaus tenor ils criteris da bio, sco era da pliras localitads che duein survir all'agricultura dall'entira regiun. Ils cuosts calculai persunter importan 3,86 milliuns francs. Cumpriu en quels ei era in indrez da fotovoltaica per la produziun d'energia electrica. Da gliendisdis Pastgas 2006 ei il baghetg d'economia dalla claustra a Salaplauna daventaus l'unfrenda d'in incendi. Quei schabetg ha confruntau la cumionza dalla claustra cun la damonda, tgei che duei succeder egl avegnir cun il menaschi agricol. Suenter liungas ponderaziuns e l'examinaziun da pareris externs, sco era discuors cun representants dil puesser dalla regiun ei il convent la fin finala sedecidius da construir in edificis niev. La finamira ei da realisar a Salaplauna ina soluziun che tegn quen dall'agricultura, mo era dalla cultura e dalla creaziun da nova valor. Cun quei project vul la claustra porscher ina contribuziun en favur dil svilup dalla regiun. Las lavurs han entschiet e duein vegnir terminadas la fin digl unviern vegnent. Igl emprend d'avrel duei la muaglia anflar cheu in niev da casa.

Cun lenna indigena

Il project scaffiu digl architect *Gion A. Caminada* da Vrin e digl inschignier *Walter Deplazes* da Surrein preveda ina construziun spirontamein ord lenn. Ils rondund 500 meters cubic lenna che deri-



Avat Daniel Schönbächler ha benediu il venderdis il piazzal. Dretg il decan e stalater pader Vigeli Monn.

FOTO H. HUONDER

van cumpleinamein dalla regiun vegnan resgiai directamein sil plaz. Persunter stat ina resgia movibla a disposiziun. Enteifer las proximas jamnas vegn resgiau a Salaplauna 289 buoras cun ina lunghezia d'entochen 13 meters. Sco quei ch'ils exponents dalla claustra puntueschan duei la construziun veseivla dil baghetg niev dar caparra dalla gronda competenza artisanala da menaschis sursilvans. Sin l'ala tetg che mira en di-

recziun sid-vest vegn construïu in indrez fotovoltaic cun ina surfatscha da varga 700 meters quadrat. Da quel spetga la claustra ina produziun annuala d'electricitad da rondund 100 000 uras kilowatt. En quei connex vegn collaborau stretgamein cun l'associaziun Solarspar da Liestal. Quella prefinanziescha era igl entir indrez. La claustra ha gia saviu rimnar experientschas cun l'energia solara sil tetg dil baghetg dil gimnasi. Cheu sesan-

fla ina surfatscha da 122,5 meters quadrat.

Considerabla investiziun

Igl entir edificis vegn a custar 3,86 milliuns francs. La cumpart dalla stalla importa 1,38 milliuns francs. Aunc buca finanzia- da ei l'expensa supplementara che sedat ord la construziun conforma als animals. En preparaziun ein era aunc las damondas concernent la finanziaziun dallas localitads

ed ils indrez pil Center sursilvan d'agricultura. La finanziaziun succeda per ina part entras mieds dall'Assicuranza da baghetgs per la stalla barschada. Sustegn vegn era dil cantun Grischun e digl Agid svizzer per las muntognas. La vischnaunca da Mustér ha mess a disposiziun gratuitamein ina gronda part dalla lenna che vegn duvrada per la construziun. La part restonta dalla finanziaziun preveda la claustra da saver amorsisar cun il tscheins dall'affittaziun.

Per 57 envernontas

La stalla sco tala che fuorma la part principala dil baghetg niev vegn concepida per 57 envernontas. En ina emprema fasa vegn ella a dar suttegg a 46,3 unitads. Igl ei previu da tener vaccas dil raz brin e dil raz grisch retic, sco era animals manedels. Igl entir menaschi vegn suttamess als criteris da bio. Aschia ei previu ina produziun da latg, da tratga e da carn. La construziun preveda ina stalla libra che corrispunda cumpleinamein als basegns naturals dils animals. Igl ei numnadamein la finamira da tener animals cun corns. Il concept dil menaschi preveda ina fuorma da lavur d'ina famiglia, d'in emprendist e d'in praticant duront il temps da stad. Part digl entir edificis duei era l'activitad dil Center sursilvan d'agricultura daventar. Ina part essenziala da quel ei la cascharia che duei vegnir installada a Salaplauna. Ella duei obtener ina capacitad d'elavurar rondund 2,5 milliuns kg latg per onn. Da cheu anora eis ei previu da commercialisar egl avegnir differents products dall'entira Surselva. En las localitads novas dil menaschi puril ein denton era previ arranschaments che pertuccan l'agricultura, la cultura e l'economia dalla regiun.

MUSTÉR

Era uonn Jamna en claustra

(anr/gc) Dils 3-8 d'ost 2008 ha liug per la 8. ga la Jamna en claustra a Mustér. Ella stat puspei sut l'egida da *Joseph Rössli*, *Walter Weibel* e pader *Urban Affentranger*. La purschida cumpeggia: cantar, musica d'orgla, excursiuns, liturgia claustrala e spiritualitad benedictina. La Jamna en claustra stat uonn sut il tema «Nossa mumma-tiara» che trastrai ton il program dil plaid sco il musical.

Cuort suenter l'arrivada – la dumengia – vegnan ils varga 60 participonts e participontas – la pli gronda part dad els deriva dalla Svizra, enzacons era dil Grischun ed entgens dalla Tiaratudestga – introduci el tema e gia entscheiva ei cun il cant dil chor (per en baselgia e tier la liturgia).

Gliendisdis prendan ins part digl ufeci da mezdi cul convent. Suenter vegn gentau da cumionza cun quel. Lu suonda ina viseta alla claustra. Mardis ei previu da visitar a Cuera la catedrala renovada. La mesjamna ei messa cun p. Urban ella baselgia da Nossadunna en claustra e suentermezdi stat in'excursiun a pei – naven da Rabius s Nossadunna dalla Glisch – sil program. A Trun vegn era visitau la «Via dalla cruscha», dad Alois Carigiet, ella Casa s. Martin.

La gievgia ei oravontut reservada per preparar il concert tradizional da quella jamna. Quel sespleiga sin treis orglas en claustra a Mustér: En baselgia da Nossadunna, sill'orgla si el chor dalla baselgia claustrala e sin la gronda da quella. Persunter prepara *Joseph Rössli* cun siu Chor dalla Jamna en claustra in vast e variu program. El ha puspei cumponiu in'ovra aposta per quei concert, ina preaudiziun che vegn apprezzada fetg dil publicum. Quel vegn dil reminent era integru el concert. Aschia cun la canzun romontscha da Nossadunna «Salve Regina» ed in canon sil tema dalla jamna.

Carmalar da star pli gitg

Brigitta e Hugo Casutt ein responsabels per la piazza da campar a Flem

■ (ac) Tgi vegn, tgi va e tgi ei fideivels dapi decennis alla piazza da campar. Sin la piazza da campar a Flem tgamunan Brigitte e Hugo Casutt quei menaschi dapi dus onns. Il radio annunzia precipitaziuns per la fin dalla jamna e quei en in quantum abundont. Buca per plascher da *Hugo Casutt*. El ei numnadamein responsabels per la piazza da campar a Flem. E quellas annunzias dall'aura influenzeschan considerabel sias frequenzas da passants che sedecidan da star ni dad ir. E quei gest ussa che la sesiun da stad stat avon porta. Ina sesiun che cuozza silpli tschun jamnas. Hugo Casutt tgamuna quella piazza da campar da cuminoza cun sia dunna *Brigitta Casutt*. Ina part da lur lavur ademleschan els sco emploiai, in'otra part lavuran els per agen quen. Il menaschi da campar da Flem ei integru el menaschi dil Center da sport Prau la Selva. Per agen quen s'engaschan els enteifer il kiosc e l'ustria. Hugo e sia dunna ein en emprema lingia responsabels da mantener l'infrastructura, schubergiar ils stabiliments da selavar e las tualettas, tagliar caglias, segar e duront igl unviern rumir la neiv. Dasperas meinan els la recepziun che noda las persunas che vegnan, ei ha num scuntrar quen, cussegljar e dar adia a quels che partan. E lu manischar l'ustria cun kiosc che porscha solver e magari grilladas la sera. La plazza da campar a Flem ei aviarta 365 gis ad onn e posseda sco las biaras piazzas da campar in bien tschep da fittaders fixes. Quels fittaders fuorman la petga finanziaza dalla piazza. Passa 80 fittaders pagan tenor grondezia dil plaz ch'el basegnan in tscheins annual da 3500 entochen 4000 francs. El ein s'installai sur onn e quels plazs stabels ein tschercai. Hugo Casutt ha relatau dad ina gliesta



Brigitta e Hugo Casutt tgiran bugen hosps da lunsch e da maneivel ell'ustria sin la plazza da campar a Flem.

FOTO A. CADONAU

da spetga per quels plazs fixes che vegnan libers.

Cussegliaders en caussa regiun

Quei che resta ein aunc trenta plazs per passants cun rulottas ed auto-rulottas ed in encarden che porscha plaz a 40 tendas. Brigitte Casutt ei gest lundervi d'expliar ad in da quels passants tgei ch'igl equipament necessari per ascender il Pinut cuosti e ch'ei seigi era pusseivel da fitar velos da muntogna. Il hosp deriva dalla Finnlada e Hugo Casutt menziunescha sia clientella internaziunala che pretendi dad el da sesvolver en plirs lungatgs. Brigitte e Hugo Casutt enco-

nuschan la purschida turistica el contuorn da Flem e quellas enconuschientschas ein beinduras dumandadas enaquella ch'ei settracta da carmalar ils hosps da passentar dapli ch'ina notg sil campadi a Flem. «Quels che vegnan cheu tier nus la stad ein sin via el sid.» Hugo Casutt ha fatg stem che quei publicum internaziunala posseda minimas enconuschientschas da Flem. Hugo e sia dunna fan attent quels hosps sin las pusseivladads dalla regiun e biars sedecidan da prolungir la dimora per in sche buca per tschun gis avon che cuntinuar cul viadi. «Els stattan pli gitg per bien da nus e dalla regiun.» Sefatschentur cul hosp, quei

fa Hugo bugen e quei sa el era. Quei deriva neu dil temps nua ch'el ha dau scola da skis. Brigitte Casutt ha dau d'entelir ch'ei seigi d'avantatg da far stem dils differents tips da clientella per aschia saver far attent sin ina ni l'otra purschida adattada. «Ei dat per mintgin enzatgei en nossa regiun.» Il tip sportiv va cun velo ni dalla scala dil Pinut si, il tip mistic va a Falera e sefatschenta cun obeliscs ni steilas.» Ed ils hosps schazegian la cussegliaziun cumpetenta.

La stagiun d'unviern ei outra

La stagiun d'unviern sedifferenziescha considerabel dalla stagiun da stad. Quella stagiun d'unviern ei buca ton ina stagiun da passants, mobein ina stagiun da persunas che vulan parcar lur rulotta duront in pèr meins. Els s'annunzian gia el decuors dil meins settember e sur Nadal e Daniev ei mintga plaz occupaus. Igl unviern gioga l'aura buca quella rolla sco duront la stad. Igl unviern ein era ils campers a Flem per ir cun skis ed els fan quei era sche l'aura ei buca ton favoreivla. Malgrad che la purschida da campar ei carschida ella regiun ein Brigitte e Hugo Casutt perschadi da s'engaschar cumpleinamein per la piazza da campar che duess garantir alla famiglia l'existenza. Hugo Casutt havess era certs giavischs pertuccont l'infrastructura da recepziun, kiosc ed ustria che vertessen ina remadura per seposiziunar meglier. Il rapport dall'aura paran aunc auters da haver udiu e buca sulet Hugo. Ina famiglia vegn per dar adia e serender vinavon cun menziunar las perspectives meteorologicas per motiv dalla partenza. Hugo Casutt ei digl avis ch'ils rapports dall'aura surfetschien cun annunziar cuntinuadaimein malauras stravagadas. «La marcort'aura sauda era tier la veta.»